

N chestionèr per valutèr i media

I aboné a La Usc di Ladins pel portèr dant sia opinion sui mesi de informazion ladins. Anter chi che respon l'é a la leta 10 abonamenc debant per l 2011 e 50 Cd.

Chestionèr - L Servije per la Promozion de la Mendranzes Linguistiches de la Provincia autonoma de Trent, con a cef l dirigent Marco Viola, l'à endrezà n chestionèr per ge domanèr a la jent de la comunizes de mendranza sia opinion sun i desvalives media che vegn sostegnui da la Provincia enstessa. Na valutazion sun i efec e l'ejit de la scomenzadives de finanziament e sostegn metudes a jir da la Pat era stata perveduda tel pian plurienal de intervenc de politica linguistica aproà da la Conferenza de la Mendranzes.

Per chel che vèrda l ladin, l chestionèr vegn portà dant travers l sfòj La Usc di Ladins: tel numer de anché i aboné de la Usc, enciasé te Fascia e te la Provincia de Trent, troa itel chestionèr olache i podarà portèr dant opinions, valutacions

e consees sun La Usc enstessa e sun Gana, sun i programes ladins de Radio Studio Record e sun chi televisives de TML e Ercaboan.

L chestionèr va manà ite a la Provincia autonoma de Trent - Servije per la Promozion de la Mendranzes Linguistiches, V. Gazzoletti 2 - 38122 Trent, ma l pel ence vegnir consegnà a man a una de chesta direzioni: Istitut Cultural Ladin - Str. de la Pieif 7 - 38039 Vich; Comun General de Fascia - Str. di Pré de Gejia 2 - 38036 Poza; Union di Ladins de Fascia - Str. de la Pieif 10 - 38039 Vich; Comuns de Fascia.

Anter chi che respon e mana ite l chestionèr dant dai 21 de otober vegn tirà fora a la brusca 10 abonamenc a la Usc di Ladins per l'an 2011 e 50 Cd.

Ajache l chestionèr vegn portà dant en forma anonima, te la

soracuerta l'é ence na zédola de color vert, spartida te doi pèrts, con scrit sù sun duta does Vosc codesc personèl: una pèrt la é da meter ensema col chestionèr te la soracuerta che darede de retorn, l'autra cognede la tegnir sù desche rezepis: se vegn tirà fora a la brusca Vosc codesc, cognarede aer la zédola per aer derit al pest.

La lista di codejes che veng vegnarà scritta o dita fora su la Usc di Ladins e sui media locai.

Per de altra informacions se pel se oujer a la Redazion de La Usc di Ladins de Fascia, a Sèn Jan, tel. 0462.764545, email: lausc@ladinsdefascia.it

Se sà ben, l'augure é che duc mane ite sia respostes, per poder coi consees de la jent miorèr semper de più i servijes e durèr i scioldi publics a na vida miora che l'é possibol.

Ti dé valour a n patrimoine global

L calender 2011 realisé da la Fondazione Fontana con l contribut dla Pat conta dl impegn de na tera de mendranzes te n mond biodesferent



La souracuerta di calender sun les mendranzes.

Mendranzes - Al é vegnù prejenté chisc dis passés l calender 2011 "Mendranzes a chi?" tl cors de na conferenza stampa a chela che à tout pert l'assessoura provinciala a la - solidarietà internazionale Lia Giovanazzi Beltrami. Realisé da la Fondazione Fontana adum con trupes d'autres realtés dl mond dles assoziacions dl Trentin y con l sostegn dla Provincia autonoma de Trent, chest calender vuel zelebré n mond biodesferent, nia valivè y nia omologhé, che auza fora les mendranzes trentines - Ladins, Mochegn, Cimbri - ma ence cheles di paisc plu dalonc, olache les assoziacions de volontariat provincialas porta inant projec de solidarietà internazionale. Vigni meis dl ann porta dant n popul de mendranza dl mond: Guarani (Brasil), Saharawi (Sahara ozidental, ex Sahara spagnol, encuei sot l govern dl Maroc), Ashanti (Ghana), Rom (Europa, chilò en particular l raion balcanich), Achuar (Ecuador, Perù), Tibetans (Tibet, en gran pert sot l control dla Cina), Ladins, mochegn y Cimbri, Batwa (Ruanda y Burundi), Miskito (Nicaragua, Honduras), Cunama (Eritrea, Etiopia; Sudan), Guaymi (Costarica), Karen (Birmanìa), Hmong (Vietnam). Valch una de chestes popolacions viv situacions de gran dificolte, perseguitades o sotmetudes a l'autorité di governs o de popui plu sters, o che ceida enchinamai de mori fora.

L'assessoura Giovanazzi Beltrami à dit che chest calender auza fora n messaje scioldi fort, che met al luster l gran impegn dl Trentin per la defendura y la valorisazion nia demé de sies mendranzes

linguistiches ma ence de cheles fora da sies confins.

L dirigent dl Servisc Mendranzes dla Pat Marco Viola à recordé che les mendranzes é sel dl mond per cie che al é la desvalivanza che ti dà saour a la vita. Perchel él debujegn de conesse, defene y valorisé les mendranzes.

Les assoziacions che à tout pert a la realisazion dl calender é: Shishu, Tempora, Tre.Ca.Sma, I bambini di Besoro, Ashanti, Assoziacion trentina de aiut per i Balcans, Assoziacion Padre Silvio Broseghini, Samten Choling, Istitut Cultural cimbro, Zenter de documentazion de Luserna, Istitut Cultural ladin de Fascia, Museo Ladin de Fascia, Istitut Cultural mochen, Museo Mochen, Amisc dl senatour Spagnolli, El Quetzal, Centro Missioni Cappuccini, Assoziacion amisc dl cor Valsella per l'Eritrea, Proiet Orchidea, Moses, Amisc dla Neonatologia trentina.

L'assessoura Giovanazzi Beltrami à porté dant ence trei projec nuefs de solidarietà internazionale sostegnus da la Pat. L prum, dl'assoziazion Moses de Madonna di Campiglio, se tol dant de assegué l azes a l'istruzion per 230 bec y joegn anter 14 y i 17 agn che vif te n ciamp per sciampés tla Birmania; l secont, dla Federazion provinciala di Zidladours dl Trentin, vuel sostegni la renasciada economica de Srebrenica tla Bosnia; l terz é n intervent trienal de dimenijons granes, realisé adum con i trei governs dl Euregio, chel dl Trentin, dl Sudtirol y dl Tirol, te n raion de confin anter Uganda y Tanzania, con l obietif de sostegni l svilup dles comunites rurales.

I gregn ensegnamenc di missionères

"Sulle rotte del mondo" à portà te Fascia Suor Annarita Zamboni e Padre Giovanni Rizzi

Solidarietè - Per l secondo an l projet provinzièl "Sulle rotte del mondo" l'é stat endò portador de gregn ensegnamenc e l'à endò arvejinà n muie de missionères trentins che laora da na vita stroz per l mond a sia tera de naa. Anter duc l'era vegnù de retorn ence Suor Teresa Bernard, missionèra tel Pakistan, che però à cognù se n jir sobito de retorn per colpa de la burta situazion de vera anter cristiegn e musulmègn che l'é te chest paisc.

Ence Fascia é stata protagonista de chesta emportanta manifestazion con doi scontrèdes. Una te la scoles e una te oratorie de Poza, olache Suor Annarita Zamboni e Padre Giovanni Rizzi à portà dant sia esperienzes de vita missionèra te l'Asia. Suor Annarita Zamboni dal 1991 la porta dant sia lurier te la Filippines, più avisa a Manila, metropoli de l'Orient

che é dò a viver i medemi mudamenc, en ben o en mèl, che é dò a caraterisèr l mond asiatic i ultimes egn. La globalisazion con l smaorament e l miorament dal pont de veduda tecnologich é chiò da na man portador de benesser e ricchezza ma da l'autra se sà ben l'é ence cauja de n smendrament di valores tradizionèi. L'arzipelagh de la Filippines a religion catolica più che n'outa te la storia l'à cognù se bater con regimes musulmègn che vel descancelèr l cristianesim e portèr inant na volontà politica de separazion dal rest del paisc. Te chest contest de ricchezza e batalia internes la condizions de vita de la popolazion é dò a ciapèr n fort mudament e donca semper de più se veit na spartizion anter jent n muie pureta che vif te baraches sot i ponc e jent che stèsc ben.

Père Giovanni Rizzi, nasciù te

la Val de Sol, dal 1954 l'é a Taiwan, olache l laora ti ospedèi e l se cruzia de la cura di malé de lebbra. Con so spirit aiegher e rich de gaissa l'à contà sia esperienzes via per chisc paijes. Duc doi i missionères tinùtima ge à sport n gran rengraziament a duta la jent che da chesta cà desmostra de aer semper na gran solidarietà: "Enceben se la domanes pecia outes les troa risposta vel dir dassen n muie saer che l'é jent che ne peissa e che ne deida. Chesta l'é la spenta più emportanta per jir inant te noscia mision".

Da pèrt del Decan de Fascia Don Giuseppe Daprà l'é jir n gran Devalpai a duc i preves e la monies che dèsc sia vita per i etres recordan coscita amò n'outa suor Betty Somavilla che più che n'outa à renunzià a sie unich bèst per chi picoi bec che vif a Kimbondo tel Congo. (vr)



Suor Annarita Zamboni e Padre Giovanni Rizzi te oratorie de Poza

La Provincia de Trent sostegn sia mendranzes linguistiches